

19. november 2018

UKA2018/170

**Inuusuttut inissiaat pillugit nassuiaammik Naalakkersuisut kingusinnerpaamik UKA2019-imi saqqummiussinissaat pillugu Inatsisartuni aalajangiiffigisassatut siunnersuut. Nassuiaammi inissianik sanaartornermi maanna suliniutaareersut sakkussallu tassunga attuumassuteqartut, soorlu ineqarnermut tapiissutinik nalilersuinermik imaqarlunilu maanna ingerlanneqartunit pisariaqartitsineq naammassineqarsinnaangippat suliniutinut tapiliussassanut kaammattuutinik imaqassaaq.**

(Inatsisartunut ilaasortat Mimi Karlsen, Inuit Ataqtigiit)

Inatsisartunut ilaasortap Mimi Karlsen, Inuit Ataqtigiit inuusuttut inissiaat pillugit nassuiaammik suliaqartoqarnissaannik aalajangiiffigisassatut siunnersuutaanut imaattumik Siumumiik oqaaseqassuugut.

Siumumiik pingaartitaraarput ineqariaatsit assigiinngitsut eqqarsaatigalugit aningaasaqarniarnikkut nammanneqarsinnaasunik najugassaqartitsinerup qulakkeerneqarnissaa ammalu soorunami toqqissisimanartuunissaa.

Ullumikkut ajoraluartumik killiffigisimasarput tassaavoq inuusuttunut inissaqartitsiniarneq ajornartorujussuummat. Siunnersuuteqartoq tassuunakkut isumaqatigilluinnaratsigu oqaatigissuarput.

Naalakkersuisut akissuteqaamminni inissaqartitsiniarnikkut innuttaasut pisariaqartitaannik naleqqussakkamik takorluugaqareernertik taavaat. Takorluugaqarnerli sumut killeqarniarpa?

Inuusuttuunermi najugassat inoqarfini tamani amingaataalluinarput, taamatuttaarlu ilinniagaqarnerup nalaani najugaq qimallugu najugarineqarallarsinnaasut amingaataasorujussuullutik minnerunngittumillu ajoraluartumik ilinniartoqarfik/ilinniartuuffigisaq najoraanni ilinniarnep nalaani najugarigallarsinnaasanut najugaqartoqarsinnaanani.

Ilinniagaqarnerup nalaani najortakkat/Kollegiat amingaataaqisut aningaasarpassuarnik atuiffiupput, ilaatigut ilinniartoqarfiit ilaanni najugassaqartitsisoqartariaqarmat aningaasarpassuit atorlugit najugassaqartitsinerit piullutik.

Aammali ilisimavarput sineriasuatsinni inuusuttorpassuit angajoqqaaminni najugaqartut, naak namminneerlutik najugaqarsinnaanertik takorlooraluarlugu inissianik naleqquttunik akilersinnaasaminnillu najugaqarusuttorpassuugaluit.

Inoqarfinni sanaartorfiunngittuni inissiat pisoqqat amerlavallaanillu initallit akisuullu annerusumik piupput. Taamaamat inuusuttorpassuit angajoqqaaminni ilaatigut inissakilliorfiusumi

najugaqartut amerlapput. Taamaammat Siumumiik isumaqarpungut inissianik nutaanik sanaartortoqarnissaa pisariaqalersimasoq ingerlanneqartariaqartorlu.

Naalackersuisut akissuteqaataanni takuneqarsinnaasutuut Qaqortoq Sisimiullu taaneqarput. Taasinermi oqaatigineqarpoq "inissiat tamanit atorneqarsinnaasut" aamma illoqarfinni allani sanaartorniarneqartut.

Tamanna qujanaqaaq, Siumumiilli isumaqarpungut illoqarfiit kisimik eqqarsaatigineqassanngittut. Inuusuttortagummi inoqarfinni tamani akilersinnaasaminnik imminnullu naleqquttumik inissanik pisariaqartitsipput.

Sanaqateqarluni illuliortarnermi aammalu piginneqatigiilluni illuliortarnerup Kommuune-nit akisussaaffigineqalernikup pitsaanerpaamik suleqatigiiffigalugu inuusuttunuttaaq kisimiikkaluartunulluunniit naleqquttumik ingerlanneqartariaqartoq Siumumiik assorujussusuaq kissaatiginartikkatsigu ilanngullugu oqaatigissuarput. Ilinniakkaminnik naammasseqaammertut angajoqqaaminniluunniit najugaqarunnaarnissaminnut piumassusillit aqutissiuunneqarnissaat tamatta pingaartikkipput qularinngilarput.

Naggataatigut Siumumiit kaammattuutigerusupparput ineqarnikkut aqqisuussinerit kittaartut massakkut ingerlassagut iluittunngorlugu suliarisariaqalerigut. Taamaaliornikkut suliat assigiingitsunik sammivillit ataqatigiinnerusumik suliarineqarsinnaassammata.

Jess Svane

Siumut